



Sud Bosne i Hercegovine
Суд Босне и Херцеговине

Broj: S1 3 Iž 052640 25 Iž
Sarajevo, 05.08.2025. godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija, Zvezdane Antonović, kao predsjednika vijeća, Dinke Bešlagić-Čovrk i Hilme Vučinić, kao članova vijeća, odlučujući o žalbi zamjenika predsjedavajućeg Općinskog vijeća Kakanj, Sanela Šabanovića, izjavljenoj protiv rješenja Centralne izborne komisije Bosne i Hercegovine, broj: 06-1-07-1-187/25 od 24.07.2025. godine, u nejavnoj sjednici održanoj dana 05.08.2025. godine, donio je

R J E Š E N J E

Žalba se odbacuje kao nedopuštena.

O b r a z l o Ź e n j e

Zamjenik predsjedavajućeg Općinskog vijeća Kakanj (u daljem tekstu:podnosilac žalbe) podnio je žalbu na rješenja Centralne izborne komisije Bosne i Hercegovine, broj: 06-1-07-1-187/25 od 24.7.2025. godine, kojom se na dužnost u članstvo Općinske izborne komisije Kakanj imenuje Alma Neimarlija.

Podnosilac žalbe u žalbi navodi da je Centralna izborna komisija BiH povrijedila odredbu člana 11 stav (6) Uputstva o utvrđivanju kvalifikacija, broja, imenovanju, obuci i razrješenju članova izborne komisije osnovne izborne jedinice u Bosni i Hercegovini, jer je izostavila dio u kome je općinsko vijeće cijeno položaj kandidata na listi koju je utvrdila komisija. Nadalje navodi povredu odredbe člana 2.15 stav (2) Izbornog zakona BiH, jer je Centralna izborna komisija BiH prekoračila svoja ovlaštenja, s obzirom da nije postojao osnov iz člana 2.15 stav (2) Izbornog zakona BiH budući da je Općinsko vijeće blagovremeno imenovalo kandidata, a potom se izjasnilo o prijelogu Centralne izborne komisije BiH.

Predlaže da se žalba uvaži, poništi ožalbeno rješenje i naloži Centralnoj izbornoj komisiji da da saglasnost na Odluku Općinskog vijeća Kakanj od 29.04.2025. godine o imenovanju Merime Haračić-Kubat.

Centralna izborna komisija Bosne i Hercegovine u odgovoru na žalbu predlaže da Sud žalbu odbaci kao nedopuštenu ili odbije kao neosnovanu.

Žalba je nedopuštena.

Odredbom člana 213. stav 1. Zakona o upravnom postupku BiH („Službeni glasnik BiH“ broj: 29/02 do 93/09) propisano je da protiv rješenja donesenog u prvom stepenu stranka ima pravo žalbe. U konkretnom slučaju, kako to proizilazi iz stanja u spisu predmeta, žalba protiv iste je izjavljena od neovlaštenog lica, kako to proizilazi iz odredbe člana 6.2 stav (1) u vazi sa članom 6.6 stav (4) Izbornog zakona BiH („Službeni glasnik BiH“, br. 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20, 38/22, 51/22, 67/22 i 24/24).

Naime, iz stanja spisa proizilazi da je žalbu podnio zamjenik predsjedavajućeg Općinskog vijeća Kakanj, Sanel Šabanović, i ista je ovjerena pečatom Općinskog vijeća Kakanj. Uz žalbu nije priložen akt Općinskog vijeća Kakanj iz kojeg bi se moglo utvrditi da je na sjednici Općinskog vijeća Kakanj odlučivano o pokretanju žalbenog postupka protiv pobijane odluke Centralne izborne komisije, tako da imenovani nema ovlaštenje da predmetnu žalbu podnosi u ime Općinskog vijeća Kakanj.

Iz navedenih razloga, apelaciono upravno vijeće Apelacionog odjeljenja Suda Bosne i Hercegovine nalazi da je žalba izjavljena od strane neovlaštenog lica, pa je istu primjenom odredbe člana 52. stav 1. Zakona o upravnim sporovima Bosne i Hercegovine („Službeni glasnik BiH“ br.: 19/02 do 74/10) valjalo odbaciti kao nedopuštenu.

**PREDSJEDNIK VIJEĆA
S U D I J A**

Zvezdana Antonović